



Na: Lider di frakshon di UPB

Atenshon: Sr. B. Dirkz

Presente

Cc: Frakshon Serberie

Fecha: 6 yùli 2026

Tema: Nominashon diputado pa partido MPB

Apresiabel sr. Dirksz,

Frakshon di MPB ta informá bo persona, den kapasidat di lider di frakshon di UPB i alabes komo partner den koalishon, tokante e nominashon di Sr. Joselito Statia komo diputado pa MPB. Frakshon di MPB ta duna balor na e komunikashon aki den e spíritu di transparensia i konsulta atministrativo i polítiko abierto, komo piedra fundamental di un koalishon ku ta funshoná bon i ta reflehá gobernashon públiko konfiabel.

Riba 18 di yùni 2026 Sra. Jolinda Craane a pidi Sr. Statia na Den Haag pa e entregá su retiro komo diputado. Mesun dia, frakshon di UPB a informá frakshon di MPB ku nan no tin mas konfiansa den Sr. Statia komo diputado. Algun minüt promé ku e reunion di konseho insular dia 29 di yùni 2026 a kuminsá, Sr. Statia a entregá su karta di retiro na gezaghèber. Kasi inmediatamente despues di esei, UPB a proponé instalashon di Sr. Roy Martina komo diputado. Frakshon di MPB a ekspresá su oposishon kontra di e nombrashon aki durante e reunion i ta mantené su posishon. Frakshon di MPB ta lamentá e manera ku e proseso aki a tuma lugá, ya ku un proseso di tuma desishon kuidadoso i transparente — un prinsipio fundamental di bon gobernashon — no a wòrdu sigui den e kaso aki.

Apenas tres luna pasá, e tres partidonan den koalishon — UPB, MPB i Frakshon Serberie — a firma huntu e Mini-Programa di Gobernashon 2026–2027 bou di e kurso primario *Ordená | Stabilisá | Avansá*. Den e programa aki, e partnernan den koalishon a komprometé nan mes eksplesítamente na restaurashon di konfiansa, akshon konkreto riba dosiènan atministrativo urgente i un estilo di gobernashon ku ta transparente, étiko i faktibel. E programa ta bisa klaramente ku bon gobernashon ta forma e base pa konfiansa entre gobièrnu i sosiedat, i ku un entrega di servishon konfiabel i efektivo na pueblo ta e meta supremo.

Frakshon di MPB ta konstatá ku e situashon aktual — e retiro diripente di un diputado riba petishon di un partner di koalishon, sigui inmediatamente pa un intento di nombrashon di un otro persona — ta den tenshon ku e prinsipionan di ordenashon, stabilisashon i kontinuidat atministrativo ku nos tur a firmá huntu.

Frakshon di MPB a konstatá ku e retiro di Sr. Statia no a tuma lugá riba su propio iniciativa i ku su salida a resultá den un desapunto amplio den sosiedat i den e aparato públiko — tantu na Boneiru komo for di ministerionan na Hulanda. Esaki ta demostrá e konfiansa ku komunitat tin den sr. Statia i e apresio pa su kontribushon atministrativo.

Frakshon di MPB ta hopi desapuntá ku e situashon aki. Na mes momento nos ta rekonosé ku Boneiru mester di un gobernashon stabil. Den e interes general di Boneiru, i den liña ku e akuerdonan di koalishon firmá huntu, frakshon di MPB ta informá su partnernan den koalishon ku e ta renominá formalmente Sr. Joselito Statia komo diputado pa MPB. Sr. Statia a deklará su mes dispuesto pa aseptá e funshon atrobe. Teniendo na kuenta e urgensia di e dosiénan atministrativo ku aktualmente ta importante pa Boneiru — dosiénan ku den e mini-programa di gobernashon a wòrdu señalá eksplesítamente komo prioridat — frakshon di MPB ta solisitá ku su instalashon wòrdu atendé ku e urgensia nesesario.

Boneiru ta na un momento krusial kaminda stabilitat polítiko i atministrativo, kontinuidat profeshonal i gobernashon íntegro ta indispensabel. Komunitat i organisashonnan sosial — inkluyendo Bonhata — a ekspresá ya kaba nan preokupashon tokante di e instabilidat aktual. Frakshon di MPB ta konvensí ku e re-instalashon di Sr. Statia komo diputado ta un paso konkreto i nesario ku ta hasi hustisia na e kurso di *ordenashon, stabilisashon i avanse* ku nos a firma huntu na bienestar general di Boneiru.

Pa último, frakshon di MPB ta subrayá ku e situashon aktual ta demonstrá e nesidat di un mekanismo di konsulta struktural den e koalishon, basá riba konfiansa mutuo, igualdat i respèt mutuo. Un tal mekanismo — kaminda tur partnernan den koalishon wòrdu konsultá na tempu, na un manera transparente i riba base di igualdat den desishonnan atministrativo i polítikamente sensibel — ta indispensabel pa prevení situashonnan similar den futuro i pa fortalecé e kolaborashon mutuo na interes di Boneiru.

Nos ta konfia ku bo persona ta tuma nota di e nominashon i nos sugerensia i nos ta konfia riba un reakshon positivo di boso frakshon.

Atentamente,

Hennyson Thielman
Lider di frakshon MPB

